

Pitsaassutsimik nalunaarusiami ilaasussamik, atuarfimmilu siulersuisut, aqutsisut aamma ilinniartitsisut ineriartortitsinermik suliaqarnissaannut kiisalu ilikkagassanut pilersaarussianut nutarsaanissamut tunngaviliisussami, naliliinissamut skabelon-imik (ilisserummik) suliaqarnissamik aallartitaqarnissaannut Naalakkersuisut peqqusiffiqineqarnissaat pillugu Inatsisartunit aalajangiiffigisassatut siunnersuut.
(Inatsisartunut ilaasortaqaq Jens Napätôk', Naleraq)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortaqaq Jens Napätôk', Naleqqameersoq, aalajangiiffigisassaattut siunnersuutaanut isumatusaartumut qujassuteqarfigaara.

Naalakkersuisut siunnersuuteqartoq isumaqatigaat, inuusuttut amerlanerusut sapinngisamik pitsaasumik angusaqarlutik meeqqat atuarfiannik naammassinnittarnissaat nunatta pisariaqartikkaa, taamaalillutik ilinniagaqarfinnut ingerlaannartumik ingerlaqqissinnaanissaminnut periarfissaqalissagamik.

Pitsaassutsimut nalunaarusiamik piumasaqaat Atuarfik pillugu Inatsisartut inatsisaanni nr. 15-imi, 3. december 2012-imeersumi atulersinneqarpoq (Atuarfik pillugu inatsit).

Atuarfik pillugu inatsimmi § 49 naapertorlugu atuarfiup pisortaata pitsaassutsimut nalunaarusiaq suliarisussaavaa, ukiumilu atuarfiusumi pineqartumi 1. oktober nallersinnagu kommunalbestyrelsimut nassiuttussaallugu. § 49, imm. 2-mi pitsaassutsimut nalunaarusiap imarisassai aalajangersarneqarput, ukuusut: *"nalunaarusiap imarisassavai ukiumi atuarfiusumi kingullermi nukarlerni akullernilu misilitsinnerni angusat, angajullerni inaarutaasumik misilitsinnerni angusat, iliuusissanik pilersaarusiorderit, agguaqatigiissillugu klassini atuartut amerlassusiat, piffissaq atuartitsinermut atorneqarpoq, napparsimanerit pillugit naatsorsuinerit, piffissaq vikarinit atorneqartartoq, atuartunik atuarunnaartussanik ilinniagaqalernissaq inuussutissarsiummillu toqqaanissaq pillugit siunnersuinerup annertussusia aamma siuliani taaneqartup pitsaassuseq pillugu nalunaarusiorderup malitseqartinnera..".* Taakkua saniatigut § 49, imm. 2-mut oqaaseqaatini taaneqarpoq: *"Paasissutissat taaneqartut tamakkiisuunnigillat. Atuarfinni pisortat taamaalillutik tamanna naleqquttuusoq naliliigunik aalajangersakkami allaaserineqartunit annertunerusunik paasissutissiisinaapput."* Tamanna ima paasineqassaaq atuarfiup pisortaata imaluunniit kommunit ataasiakkaat namminneerlutik aalajangersinnaavaat, inatsimmi piumasarineqartut saniatigut suut ilassutigissanerlugit.

Kommunit assigiinneqqaat, atuarfillu pillugu assigiinngitsunik anguniagaqarlutillu suliniuteqarfeqarput. Assersuutigalugu kommunip ataatsip matematikkimi angusat pitsaanerulersinnissaat suliniutigisinnaavaa, kommunillu allap atuarfiup pisortaqarnera suliniutigisinnaallugu. Aammalu anguniakkat suliniutillu kommunip ataatsip iluani atuarfimiit atuarfimmu assigiinngisitaarsinnaapput. Taamaattumik naliliinissamut skabelonimik, kommunit tamarmik anguniagaannut suliniutaannullu assigiinngitsunut

tulluurtumik sananissaq ajornakusoortorujussuuvoq. Tamanna pissutigalugu Ilinniartitaanermut Aqutsisoqarfiup Ilinniartissuullu pikkorissartitsinerminnut periusissiatik allanngortippaat, atuarfiit kommunillu namminneerlutik pikkorissaanernik ineriartortinniakkaminnillu pisariaqartitaminnik ukiup ingerlanerani kissaateqarsinnaalersillugit.

Taaneqartut saniatigut Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup “Atuarfimmi atuartitsissutini atuartitsissutinilu qanitariissuni alloriarfiit siunertaat kiisalu atuartitsissutit siunertaat ilikkagassatullu anguniagassat pillugit Namminersornerullutik Oqartussat nalunaarutaat nr. 16, 24. juuni 2003-meersup nutarterneqarnissaa suliarivaa. Iikkagassatut anguniagassat maannakkut atuuttut ilisimasassat piginnaasassallu annertuumik imarivaat, ilikkagassatulli anguniagassat nutaat piginnaaneqarfissat annertunerusumik imariumaarpaat. Siunertaavoq ilikkagassatut anguniagassat nutaat ilinniartitsisut atuartitsinerminni pisariinnerusumik atorsinnaassagaat, aammalu ilinniartitsisut atuartut atuartitsinermi pissarsiaannik naliliinerminni pisariinnerusumik aallaavigisinnaassagaat.

Suliap taassuma nangissutaanik Ilinniartitaanermut Aqutsisoqarfiup atuarfimmi ilikkagassatut pilersaarutit nutarterneqarnissaat aallartippaa. Iikkagassatut pilersaarutit ilikkagassatut anguniagassanik ilitersuutinillu imaqarput. Iikkagassatut anguniagassat 2022-p naanerani naammassisimanissaat naatsorsuutigineqarpoq, ukiumilu atuarfiusumi 2023-2024-mi atorqealertussaallutik. Iikkagassatut anguniagassanik ilitersuutinillu tamanik suliaqarneq 2023-imi naammassisimassasoq naatsorsuutigineqarpoq.

Naggataatigut oqaatigineqarsinnaavoq Naalakkersuisut meeqqat atuarfiat pillugu isumasioqatigiisitsinissatik pilersarusiormassuk, tasanilu nalileeriaatsit assigiinngitsut siunissami atorumaartussat oqallisigineqassapput, oqallinnernilu taakkunani pitsaassutsimik nalunaarusianik piumasaqaat suli tulluurtuunersoq eqqartorneqarumaarpoq.

Naak siunnersuut isumatusaartuullunilu pissutsinut naleqqukkaluartoq qulaani taakkartorneqartut aallaavigalugit Naalakkersuisut siunnersuut itigartitsissutigineqassasoq inassutigaa.